

四庫全書

集部

欽定四庫全書

粵西文載卷十一

桂林府通判汪森編

志

廣西郡縣志

有序
通志名勝志

明
蘇濬

按山海經桂林八樹在番禺東尚矣然所稱離耳北胸亦多荒忽莫能睹記云以余所睹桂嶺灘江旁礪秀發山銳而削水駛而清人文彬彬然幾埒於齊州豈在扶

疎輪菌哉至若總領三江控制諸郡殆所謂扼西夸之
吭而拊其背者邪曩時古田之囂侏離魑結生於肘腋
而傳刃於大吏之腹中邑無完郭民無寧宇矣天子赫
然震怒芟蕪而殄夷之分官而守列戍而屯諸蠻部落
願授一廛出箐輸賦者皇皇然恐後斯亦安瀾之際已
然都會大地間伍雜居將軍中尉日繁供億戍已車師
之族按籍則贏勾稽則縮甚且弄諸夸於勾股之上用
啓戎心今古田諸猺蠢蠢萌動材官幾不能制其命而

若靈川之七都興安之六峒全州之西延義寧之白面
寨亦時時嘯聚語曰涓涓不塞終成江河非細故也詩
戒桑土易謹衣衽其在今日哉

柳州山水清曠峭拔上多奇峰石洞玲瓏流泉如環珮
仙靈遺迹往往而在其人亦多聰穎士喜經術自唐已
然矣乃其形勢東北連昭桂西南接黔邕控扼番落封
疆不啻千里衆流逶迤與牂牁會邊於夜郎為駱越要
害足以控制諸蠻云然猺獠環雜喜則人怒則獸雖增

壘置堠猶不能約束也自征古田城懷遠民始有寧居
焉邇者拊循之吏單騎入諸部落盡謝去騶卒徭人見
吏如見乳母相與昵昵語則嘻嘻然曰不圖今日見漢
官威儀何簡略若是遂輸絙相屬惟恐後時者來賓遷
江為八寨項領崇岡複嶺與藤峽互為蜿蜒狐穴虺窟
蔓滋其中陽為順而陰為逆者踵相接也記曰一張一
弛文武之道酌其權而迭用之庶其有瘳乎

慶遠內地州縣有五其外三州一縣二長官司則世據

其地不純用中國法皆羈縻類也郡直西垂越柳之外
戍壘密遮使車罕至士抱經而談民雜兵而種亦一簡
佚自足之土第州縣服役我者零若晨星河池既遠而
荔波又寄絕域緩急無所賴忻城內屬而輕變更二司
內地而棄之若脫屣慶益單薄矣外州日以強獷客主
不敵識者憂焉第以數州較全廣螳螂車轍不足以喻
也申畫慎固振紀肅綱何憂叢爾諸夸哉

昭介桂梧之間西北近楚為五嶺之一清湘九疑鬱相

膠馬東南入梧巨石急灘如坂上走九溪洞林樾多為
猺獐盤據一夫不靖醜類陸梁向者去城不二里輒矯
矢縱矛斬艾人若草菅然沿江左右樹木蔚蒼無論車
脂其輅馬停其轡即大吏駕餘皇且肱篋而斂之矣今
上即位撫臣慨然首建石畫羣諸材官擣虛批亢旂旆
所指炎於崑岡迺議伐木通道令阻采之處夸為周行
而又增置樓船繕脩校壘迺今單騎直馳往來如織重
裘下上帖席而安蓋郡千百世利哉郡治故寥濶山田

仰泉不甚作苦茅茨竹戶魚鹽粗贍亦足稱小康矣夫利害相尋譬之糾纏倚兵滅蠻蠻盡而兵久戍不玩則驕憂且在兵兵無固志憂復在夸識微者其豫圖之可也

蒼梧兩粵一都會也北自灘江建瓴而下西則牂牁及鬱合為巨浸綰轂三江之流而注之大壑故論西則桂林為堂奧而蒼梧為門戶論東則南海為心腹而蒼梧為咽喉控上游而據要害其指顧便也顧右枕藤峽八

寨諸酋往往出沒左接粵東犬牙相錯而狐穴狼窟時
跳梁其間烽火相望刈人如蓬藿然於是閭里蕭條沃
土為墟矣成化間始設重臣茲土兼制兩粵命將簡師
羣不逞而殲之然醜類陸梁未可盡馴旋復征又旋復
叛行者齋居者送西南之民罷焉今上神武震於遐方
於是闢榛塗為周行變醜夸為編戶營壘基置材官星
列而梧人始獲安枕以嬉天造草昧豈偶然邪然罷久
則蠹法久則玩邇者大禋即蠢蠢然動矣若嚴信地謹

斥埃俾戍無虛役卒無虛餉惟在慎擇將帥哉

潯水國也北黔南鬱二江合流山水奇秀映帶城郭連
數百里勢如游龍又其土原隰沃衍商舟輻輳其民亦
多淳樸食土之毛差足自給吏茲土者滌其煩苛因俗
而理蓋號易治云貴縣龍山為大藤右臂狶突狼奔者
幾數十載自襄毅先驅藤峽久斷文成繼績江豚不波
翁仁夫田叔禾復因其不逞而芟薙之諸酋莫不頓顙
聽約束恐後者顧深箐盤結淵藪實繁上失其馭下啓

戎心今五山又見告矣賴當事者先幾以伐其謀馴而擾之以柔伏其心卒之罪人斯得反側自安則定計於蚤也夫餘皇之罅也衣袵可繻一不戒而中流乘之茲其殷鑒也哉

南寧故稱邕管牂牁羅甸峙其西北交趾踞其西南三十六洞錯壤而居延袤幾千里橫山永平尤稱要害歷唐及宋建牙置帥與桂州等誠重之矣又郡地最夷曠可宿數萬師曩者征田州及經略安南舉弭節茲土則

其勢便也自強夸不靖往仗狼兵急則藉其前驅緩則
檄為守圉諸酋稍稍驕恣不可盡繩以文法策邕事者
至欲開重鎮以復唐邕州督府之舊嗟夫事固未易更
亦未易言也天下未嘗無弊法而有治人不更人而更
法法日更弊日甚耳昔唐之患咎不在夸而在帥今之
患咎不在夸而在大吏大吏一不當左右為奸上下相
遁墨吏易於激亂罷吏反以滋亂卒令椎髻之朋得持
吏短長而莫之詰此其咎豈專在夸邪邇者安南羽書

交馳境上債帥耽耽因以為市此非細故也夫惟擇賢而官相機而動令諸部落謂中國有人雖不增亭障足矣

太平故淪於夸唐宋稍置吏第羈縻使之侏儻結猶仍故習黠者雄戈矛侗者執鉏耰而詩書之源缺焉蓋虞教之所未賓而漢法之所不治也我明用夏變夸寒崖幽谷舉被春曦濛汜隙光亦歸餘照以故太平州縣若左若養利若永淳永康願束髮鱗次比於中土用是

設官師興學校冠帶之族後先相望舉數千載晦昧之區若闢乾坤而造之者天生聖人豈偶然邪至如羈縻諸州縣為中國藩圉虎符朝至騶發夕行靡敢干焉於戲盛矣昔胡端敏守是邦諸酋長頓顙恐後翁司馬治兵茲土而龍州獻十八村以歸我版圖繼二公而興者其威德庸可異邪

思恩初僅八百戶後增至二千三百餘戶末大必折數盈必虧固其變也樂卻之後其汰已甚翦焉傾覆曾不

崇朝況土酋哉正德以來用夏變夸新建行賈生主父之策以殺其强悍之勢移虎狼之穴以潛消其不馴之心機密於鬼神而釁杜於微眇至今安瀾誰之功也聞之長老曰舊治四面絕壁署據礧礧觸處皆芒利礪研之石如在矛戟中瘴霧昏塞薄午始開今治四野寬曠軒豁秀麗後山起伏蜿蜒敷為平原兩水繞山合流而入巨浸江水既通商貨輻湊益比於內地矣武緣之更置吳公良足多哉然亦新建意也今之議者多以田州

之事為新建遺恨余謂田州之過小而思恩之功大夫其過也固所以為功夫

桂林府本秦郡北疆漢分屬零陵蒼梧東漢為始安侯國三國吳置始安郡屬荊州晉屬廣州宋改為始建國齊復為始安郡梁兼置桂州於蒼梧鬱林之境無定所大同六年始移於今治隋初郡廢大業初又廢州復為郡唐武德中復為桂州天寶初又復為始安郡至德間改郡曰建陵乾元初復為桂州光化間陞靜江軍節度

五代時屬南漢宋仍為州紹興間陞靜江府元改靜江路明改桂林府領州二縣七

附郭

臨桂縣本漢零陵郡

始安縣地晉屬始安郡唐析置福祿縣貞觀初省入更名臨桂宋以慕化縣省入元明因之興安縣本漢始

安縣地唐武德中置臨源縣大厯三年峒寇萬重光誘桂林等九縣構逆獨臨源不應因改名全義縣晉時以縣置溇州宋初州廢太平興國三年避太宗御名因改曰興安縣元明因之靈川縣本始安縣地唐龍朔初

析置靈川縣宋元明因之陽朔縣本始安縣地隋析

置陽朔縣屬桂州因山為名唐初析置歸義縣貞觀初

省入宋元明因之永福縣本始安縣地唐初析置永

福縣因鄉為名屬桂州宋元因之明正統間省理定縣

入焉義寧縣本唐靈川地五代晉時馬氏置義寧鎮

後陞為義寧縣宋開寶中省尋復置元明因之永寧

州本始安縣地唐析置純化縣永貞初改慕化縣乾寧

初又析慕化置古縣屬始安郡宋屬融州後屬靖江府

元因之明改古田縣嘉靖末猺獞越會城劫藩帑中丞
殷正茂討平之奏陞永寧州 全州秦屬長沙郡漢為
零陵郡之洮陽零陵二縣地三國屬吳隋置湘源縣隸
永州五代晉時改為清湘縣置全州宋隸荆湖路元改
置全州路明洪武初改路為府九年改為州省清湘縣
入焉隸湖廣永州府二十八年改今屬 灌陽縣本漢
零陵縣地吳析置灌陽縣因灌水為名隋省入湘源縣
大業末蕭銑復置隸全州唐初省後復置屬永州五代

時馬氏屬全州宋元明因之

柳州府秦桂林郡地漢屬鬱林郡三國吳復屬桂林後
又析置馬平郡梁大同中兼置龍州以龍見得名治龍
江南隋開皇中廢郡徙州治江北尋廢以馬平縣置象
州大業初州廢以其地屬始安郡唐置昆州治馬平縣
尋改南昆州貞觀八年始改柳州謂地當柳星云天寶
初改龍城郡乾元初復為柳州光化後為楚馬氏所據
五代時屬南漢宋仍為柳州咸淳初徙治柳城縣之龍

江元至元中改置柳州路明改柳州府領州二縣十

附郭馬平縣本漢潭中縣地屬鬱林郡三國吳置馬平縣

隋屬象州大業初州廢以縣屬始安郡唐屬昆州後為

柳州治宋元明因之洛容縣本漢潭中縣地唐貞觀

中置洛容縣屬柳州宋嘉祐中省象縣入焉元明因之

羅城縣本桂林之珠州洞地宋開寶中置羅城縣屬

融州熙寧中省入融水縣明洪武初復置縣屬融州十

年州廢改今屬柳城縣本漢潭中縣地梁置龍城縣

隋初屬桂州後屬始安郡唐初以縣置龍州貞觀間州廢以縣屬柳州宋景德中改為柳城縣治龍江元移置龍江東明因之 懷遠縣本牂牁夜郎之境宋至和中

置三口寨崇寧中於寨置懷安軍尋改平州又置懷遠縣政和初州縣俱廢宣和初復置州紹興中州廢復置縣屬融州元因之明洪武十年縣置三江鎮巡檢司十四年復置縣改今屬 融縣本漢潭中縣南齊改齊熙縣及置齊熙郡梁兼置東寧州隋廢郡改為融州及改

縣曰義熙大業初州廢以縣屬始安郡唐復置融州又
改縣曰融水為州治天寶初改州為融水郡乾元初復
為融州宋置清遠軍節度元改置融州路尋改為州明
改為縣以融水縣省入 來賓縣本秦桂林郡唐乾封
間置嚴州領來賓循德歸化三縣宋廢州省歸化武化
二縣入來賓隸象州元因之明改今屬 象州本秦桂
林郡地漢為鬱林郡中溜潭中二縣地陳置象郡隋罷
郡置象州治馬平大業中廢州別置象縣屬始安郡唐

復置象州治陽壽縣天寶初改為象郡乾元初復為象
州元改置象州路後復為州明以陽壽縣省入武宣
縣本隋始安郡之桂林縣地唐析置武宣縣屬象州乾
封初省桂林縣入焉宋元明初因之明後改為武宣縣
賓州本秦桂林郡地漢置領方縣屬鬱林郡吳改臨
浦縣晉復改梁於縣置領方郡隋初廢郡以縣屬尹州
復屬鬱林郡唐初屬南方州貞觀間析置賓州治領方
縣天寶初改安城郡後改領方郡乾元初復為賓州宋

開寶間州廢尋復置元改置賓州路後改為州明因之
遷江縣本唐邕州地大厯間置思剛州屬邕州都督
府宋天禧中改為遷江縣屬賓州元明因之上林縣
本領方縣地唐初置上林縣屬邕州宋改屬賓州元明
因之

慶遠府秦象郡地漢為交趾日南界後淪於蠻唐始置
粵州乾封中改曰宜州治龍水縣天寶初改龍水郡乾
元初復為宜州五代時為楚馬氏所有後屬南漢宋平

嶺南仍為宜州屬廣西路宣和初置慶遠軍節度咸淳
初改慶遠府元至元中改置慶遠路明復改為慶遠府
領州四縣五長官司二

附郭

宜山縣本唐龍水縣為宜

州治宋嘉祐間省路曹縣入焉熙寧間又以古陽迷昆
二縣省入宣和間改為宜山以縣有宜山故名元明因
之 天河縣唐置隸宜州宋初因之大觀初割隸屬融
州靖康初復置隸宜州元明因之 思恩縣唐貞觀間

置隸環州宋慶厯中改隸宜州大觀初以帶溪寨置溪

州割此縣隸之後州廢復以縣隸宜州元明因之河
池州本唐羈縻智州地宋置河池縣隸宜州以富力縣
省入大觀初即縣置庭州改名懷德尋廢州復改為河
池縣明洪武初又省三旺州入焉正德間改為州忻
城縣唐置芝州治忻城縣天寶初改忻城縣屬嶺南道
後復改為芝州宋慶厯間廢芝州以忻城縣隸宜州元
明因之南丹州舊為蠻峒唐為羈縻極邊之地宋元
豐三年立為南丹州設土官管轄諸峒郡首元屬慶遠

南丹溪峒等處安撫司明洪武初仍為州省永鸞福延
四州入焉二十八年州廢設南丹衛尋復置州 荔波
縣宋置荔波州以羈縻蠻人元仍南丹安撫司明洪武
初廢入思恩縣十七年復析置荔波縣隸府正統十二
年改隸南丹州轄方村蒙村窮來三巡檢司 東蘭州
宋嘉寧五年置蘭州紹興間命土人韋姓者為知州元
改為東蘭州明因之洪武十二年省安息忠文三州入
焉 那地州唐為蠻獠所居之地名曰那宋崇寧間納

土置地那二州大觀初析地州建隆縣置孚州宣和中
孚州廢元仍為那地二州明洪武初省那入地改為那
地州 永定長官司在府城西莫徕鄉明弘治五年開
設 永順長官司在府城西述崑鄉開設同上

平樂府秦桂林郡地漢屬蒼梧郡三國吳置平樂等縣
屬始安郡宋屬始建國齊屬始安郡隋初廢郡以縣屬
桂州大業初州廢縣仍屬始安唐置樂州治平樂縣貞
觀中改昭州以昭潭得名天寶初為平樂郡乾元初為

昭州五代時屬南漢宋開寶中仍為昭州屬廣南西路
元大德中改為平樂府明因之領州一縣七

附郭

平樂

縣本漢蒼梧荔浦縣地吳析置平樂縣隸始安郡唐初
縣置樂州後為昭州治宋以永平縣省入元平樂府治
此明因之又省立山縣入焉恭城縣本漢蒼梧郡地

自晉至隋皆為始安郡地隋末蕭銑始置恭城縣唐初
置樂州後隸昭州宋仍舊元屬平樂府明因之富川
縣本漢舊縣屬蒼梧郡吳屬臨賀郡隋初屬賀州後屬

始安郡唐初仍屬賀州天寶初更名富水縣後復舊宋以馮乘縣省入元因之明改今屬賀縣本漢臨賀縣屬蒼梧郡吳以縣置臨賀郡宋改縣齊為臨賀國陳仍為郡隋廢郡置賀縣大業中改臨賀縣後又改綏越郡唐改賀州或為臨賀郡宋仍為賀州而臨賀縣常為治所元以桂嶺省入明洪武初省臨賀縣入州尋改州為縣及改今屬荔浦縣舊屬桂林府本漢舊縣屬蒼梧郡在荔江北因名吳屬始安郡隋屬桂州唐以縣置蒙

州後州廢縣還屬桂州宋以永寧縣省入元明因之

修仁縣舊屬桂林府本漢荔浦縣地吳析置建陵縣梁立為郡隋初省郡復為縣屬桂州唐貞觀初於縣置六州尋廢州復為建陵縣長慶中改修仁縣宋熙寧中省入荔浦縣元豐初置元明因之 永安州舊為桂林府

立山縣明洪武初縣廢改隸平樂其地猺獞巢穴頻年結聚荔浦大藤峽諸賊為寇成化十三年改設州治

昭平縣秦漢以來為臨賀地梁析臨賀太平嶺地置南

靜郡附郭為龍平隋廢郡以縣屬始安郡唐武德析置
思懃馬江合龍平為三縣宋開寶省思懃馬江入龍平
屬昭州熙寧中改屬梧州元豐中復屬昭州宣和間改
名昭平元復為龍平尋省入平樂縣明萬厯初復為昭
平縣隸平樂府

梧州府秦桂林象郡地後為南粵所據漢武帝平南粵
置蒼梧郡廣信縣於今治元封五年置交趾部刺史治
此建安中始改交趾部為交州三國吳屬廣州晉以後

因之梁屬成州隋廢郡為蒼梧縣屬封州唐屬靜州尋以縣置梧州天寶初改蒼梧郡乾元初復為梧州五代時屬南漢宋仍為梧州元至元中改置梧州路明改為梧州府領州一縣九

附郭

蒼梧縣本漢廣信縣為蒼梧

郡治隋初改蒼梧縣屬封州後州罷復屬郡唐於縣置梧州宋以猛陵戎城二縣地省入元明因之 藤縣本

漢蒼梧郡之猛陵縣地晉屬永平郡隋平陳郡廢置藤州治永平縣大業中州廢復置永平郡唐復為藤州天

寶初改感義郡乾元初復為藤州治寧風縣宋徙治鐔
津縣元因之明洪武初改州為縣省鐔津縣入焉 容
縣本漢合浦縣地晉分置宕昌縣梁改曰陰石縣置陰
石郡隋廢郡改曰奉化又改曰普寧屬藤州唐置銅州
貞觀中改容州以山為名天寶初改普寧郡乾元初復
為容州元改置容州路後復為州明洪武初改為縣以
普寧縣省入 岑溪縣秦為南海郡地溪為蒼梧郡梁
置永業郡尋改為縣隋屬瀧州唐置南義州復徙治岑

溪縣宋避諱改南儀州熙寧中州廢以岑溪縣隸藤州
明改今屬 懷集縣本漢四會縣地屬南海郡晉置懷
遠縣屬新會郡劉宋析置懷集屬建綏郡隋屬廣州唐
置威州尋廢開元初以永固縣省入宋初又省泮水縣
入焉元屬賀州明洪武初改今屬 鬱林州本秦桂林
郡地漢屬鬱林郡梁置定州後改為南州隋改為鬱州
後屬鬱林郡唐屬貴州又析為牢州南尹州麟德初析
置鬱州治鬱平縣乾封初改鬱林州天寶初改鬱林郡

乾元初復為州五代時地屬南漢宋仍為鬱林州遷至興業至道初徙治南流元因之明洪武五年省南流縣入焉領縣四博白縣秦屬象郡漢為合浦縣地唐初析置南州并置博白縣以山為名尋改南州為白州宋廢州以縣隸廉州未幾州復置政和初又廢州以縣隸鬱林州尋復置紹興間復廢州以縣隸鬱林州元明因之北流縣本漢合浦郡地隋置北流縣屬越州後屬合浦郡唐屬容州或屬普寧郡宋元仍屬容州洪武十

年改屬鬱林 陸川縣本漢合浦地隋析置陸川縣屬
越州大業初省入北流縣唐復置屬南巖州貞觀中屬
潘州開元中屬容州宋廢順州以龍豪等四縣省入移
治公平淳化中又移治溫水元屬容州明洪武四年改
屬鬱林州 興業縣本陳石南縣置石南郡隋廢郡以
縣屬尹州後屬鬱林郡唐屬貴州麟德初析置興業縣
屬鬱州建中初以石南省入宋開寶中以鬱平興德二
縣省入元明因之

潯州府秦桂林郡地漢置鬱林郡治布山縣

今桂平

其東

屬蒼梧吳以後因之梁分鬱林於此置桂平郡隋廢桂

平郡為縣屬鬱林郡唐屬蘆州貞觀間始置潯州治桂

平天寶初改潯江郡乾元初復為潯州宋省尋復置元

至元中改置潯州路明洪武元年以貴橫二州及永淳

縣來屬三年改路為府改貴州為貴縣九年以橫州永

淳縣割屬南寧府領州一縣三

附郭

桂平縣本漢布山

縣為鬱林郡治所梁置桂平郡隋廢郡於布山縣地置

桂平縣屬尹州後屬鬱林郡唐屬鸞州貞觀於縣置潯
州後省陵江縣入焉宋開寶中州廢以縣屬貴州尋復
置州元明因之 平南縣本漢猛陵縣地屬蒼梧郡晉
置武城縣劉宋改置武林縣屬永平郡隋初屬藤州唐
貞觀中分置平南縣後自武林移龔州治此領陽川武
林隋建大同四縣宋省四縣入平南後又以思明之武
郎縣省入紹興中州廢以縣隸潯州元明因之 貴縣
本秦桂林郡之南境漢為鬱林郡之廣鬱縣吳改陰平

縣晉改鬱平縣仍舊鬱林郡梁置定州改南定州隋初
郡廢改曰尹州大業初又改鬱州治鬱林縣尋改鬱林
郡唐初改南尹州貞觀中改貴州仍舊治天寶初改懷
澤郡乾元初復為貴州宋改鬱平縣曰鬱林縣為州治
元因之明廢鬱林縣改州為縣及改今屬 武靖州本

大藤峽內碧灘驛峽賊既平成化二年上隆州知州岑

鐸以宗黨不睦請遷州治於此賜名武靖

今詳左江
土司志

南寧府秦桂林郡地漢為鬱林郡之領方縣地晉分置

晉興郡隋平陳廢郡為縣屬簡州後改曰宣化縣屬鬱
林郡唐初於縣置南晉州貞觀中改為邕州天寶初改
朗寧郡乾元初復為邕州後置建武軍節度宋仍為邕
州隸廣南西路大觀初改軍名永寧元至元中改置邕
州路泰定初改為南寧路明改路為府領州三縣三

附郭宣化縣本秦桂林縣地漢為鬱林郡領方縣地晉置

晉興郡隋廢郡為縣屬尹州後改宣化縣屬鬱林郡唐
初於縣置南晉州後改邕州宋省朗寧思籠如和四縣

入焉元明因之 橫州本秦桂林郡地漢為合浦郡高

梁縣地吳分置合浦北部晉屬寧浦郡梁又分立簡陽
郡隋廢郡置簡州治寧浦縣又改緣州大業初州廢以
縣隸鬱林郡唐復置簡州尋改南簡州又改橫州宋因
之元初改置橫州路尋復為州明洪武初隸潯州府十
年改為橫縣隸南寧府十四年復為州 永淳縣本秦
桂林縣地漢屬鬱林郡唐初置淳州治永定縣永貞元
年改巒州宋初廢巒州以永定縣屬橫州熙寧中省元

祐中復置改永淳縣元明因之 上思州唐置宋屬邕

州遷隆寨元屬思明路明因之弘治十八年改屬南寧

府

上思本土州土官底簿云洪武二年給印委江州致仕土官黃威震次子中榮署州事三十三年除同知

永樂元年陞知州中榮死子智永十一年襲正統九年

智永死子

瑛景泰四年襲

舊通志云中榮生二子黃

瑛黃瑛瑛襲無子成化五年乞他兒育以為嗣名黃富

既而生嫡子

黃璽後瑛作亂侵南寧地繫獄死璽保襲

弘治三年黃富與璽爭襲訟于官未白時思明府又濫

保黃璽子

黃璽孫黃理當襲不報理乃糾遷隆洞黃愷

作亂至十三年捕獲誅之十四年思明官族黃澄復糾

黃愷子

添貴兵逐上思攝印孫同知而據州以叛總督

劉大夏檄當道捕獲黃澄誅之而添貴奔於蠻洞十八

年州目

趙宣等奏以州改流官隸南寧府思明土官黃

賜詔列黃智永宗系以族人黃寧冒襲為監司所駁正德六年又冒以黃鏐保襲州目廖丙等證其詐黃賜遂嗾黃鏐糾合黃添貴兵為亂總督林廷選遣兵捕鏐繫潯州獄後姦細詐為文書下潯州釋鏐鏐復與其黨殺掠州境嘉靖元年總督張嶺遣官兵討獲擒送軍門擒妻子并斬賊黨鏐死於獄仍棄市州境遂平

隆

安縣本宣化之那九村先議設馱演那樓寨巡檢司彈壓嘉靖七年新建伯王守仁有事田州相度其土曰可縣也乃請置縣曰隆安 新寧州舊為四峒界宣化江惠二州間嘉靖中峒民黃網率其黨效款因改四峒為四都曰武黎曰華陽曰沙水曰吳從隆慶間設州曰新

寧治沙都

遷隆峒古交趾地宋皇祐中黃勝奇從狄青征儂智高有功置遷隆峒巡檢司隸思

明府明初改隸南寧

太平府漢交趾郡地號麗江晉以來夸獠居之唐為羈縻州隸邕州都督府其後或臣或叛宋平嶺南於左右二江溪峒立五寨其一曰太平與古萬遷隆永平橫山四寨各領州縣洞屬邕州建武軍節度元初仍為五寨後廢置太平路於麗江以控制左江溪洞州縣明洪武二年改為太平府初治馱廬未幾復還麗江領州四縣

一 崇善縣古名崇山即舜放驩兜處宋置崇善縣隸

古萬寨元改今屬明因之

土官底簿云趙福賢係崇善世襲土官知縣趙元佐子洪

武元年款附二年授知縣患病子暹永樂元年襲宣德三年為侵占地方殺擄全家抄劄景泰二年太平等州縣鄉老告保李循懋承襲不許正統三年改設流官 左州舊名左陽唐置隸邕

州宋隸古萬寨元改今屬明因之土官黃姓洪武中黃

勝爵兩傳子孫爭襲相仇殺成化十三年改流州治舊

在龍村知州李欽承遷於古欖萬歷二年始建學

土官底簿

云黃郭鼎前元左州知州黃萬明子被上思州官族黃宗順興兵侵占郭鼎流移龍州洪武元年歸附前土官

知府黃英衍將原占本州印信繳納總兵官處二年降
本州印信英衍拘留在己三年本州鄉老接郭鼎回州
復業郭鼎死子佛生二十二年署事二十八年為謀殺
等事令其子慶斌暫署事三十年為陳情事提取絕嗣
本年除流官知州張思溫赴任三十二年放回為民鄉
老張五等告保黃勝爵係土官宗派應襲三十二年准
襲本州同知永樂元年陞知州舊通志勝爵死子德
高襲德高死子蘊亮宣德七年襲蘊亮生子三長昱次
倚季昂天順六年蘊亮死昱倚爭襲構兵為亂督府捕
昱倚繫獄皆死以其弟昂襲昂死絕嗣當道議改流官
成化十三年銓流官知州韓隆周道安黃達相繼蒞任
弘治元年銓知州何東十三年土人黃金謀復土官作
亂下獄死正德間韋廣明又捏詐謀復下獄死其
弟廣隆復奪州印奔下雷峒督府遣兵捕誅之

養

利州州有養山利水合以為名土官趙姓明洪武初有

趙日泰者歸附授知州以次傳襲至宣德間稍用侵其

鄰境殺掠萬厯三年始平之因改流

土官底簿云洪武初養利土官趙志

興歸附授知州志興死無子弟方襲方死子武寧幼弟志真署事永樂元年武寧出幼准襲武寧死庶兄武高五年襲舊通志云宣德初以罪誅滅改設流官 永康州舊名康山宋置縣隸

遷隆寨元隸太平路明如之土官楊姓成化八年其子

孫楊雄傑糾合峒賊二千餘人入宣化縣劫擄且偽署

官職總兵官趙輔等擒誅之因改流

土官底簿云楊榮賢前元永康縣尹

楊朝英子洪武元年歸附授知縣榮賢死十六年子益愆襲益愆死子武高永樂十年襲武高死子瓊宣德七

年襲瓊死子雄傑成化二年襲後以罪誅成化十四年改設流官銓選潘衡

上石西州唐

置石西州宋加上字屬永平寨元屬思明路明改路為

府因屬焉後乃改屬太平州

土官底簿及通志云何士弘係靜江府人因上石西

州官亡絕本府舉保權辦州事洪武二年授知州士弘死二十一年子義署事亦死無子成化十三年思明府土官黃瑯弟黃瑑保攝州事死亦無嗣十五年遂改流官銓知州彭侃歷任滿去思明府又以族人黃高攝州憑祥李廣寧計贖其印督府追給流官殷興掌之後與為土人毒死繼選知州董鳳遂畏瘴毒不敢入州思明府官族黃貴寧因而據州攝其事弘治六年況村黃紹攻州奪其村十有八與幼子黃文華領之事聞以兵討之十二年紹納款願還徵其印貯於藩司貴寧復以妾育他兒名景祐謀管所轄村十有七賂奸司黃球等矯

府帖付景祐攝州事復妄請給印
督府坐貴寧罪仍以印給流官

更土官趙氏何氏黃

氏凡三姓皆絕始改流然自知州殷興為土人毒死其
後陞授來者概不敢入多寄孥於太平以承使令之乏
萬厯十九年知州孫繼先始新州治攜家人從拓城甃
井略改觀焉自後復鞠為戎莽之場至天啓二年閩人
吳爾施乃披荆棘而進崇禎間歸併本府通判管理
思恩軍民府漢屬交趾唐為思恩州屬邕乃澄州止戈
縣地宋開寶間廢澄州以止戈賀水無虞三縣省入上

林治平間以上林之止戈入武緣隸邕元屬田州路歷
代羈縻而已明洪武初土官岑永昌歸附授思恩知州
仍屬田州永樂初改屬布政司時居民僅八百戶永昌

死子瑛襲

土官底簿云永昌係岑堅第三子前元有兄永泰隨父堅同詣軍前納款洪武二年授永

泰思恩知州永泰死無子永昌係親弟告襲永樂四年
患病次男璵告替七年准替十八年璵死無子弟瑛襲
瑛有謀略善治兵尤當上官意前後鎮守大帥皆優異

之洪熙間從鎮遠侯顧興祖奏以武緣白山峒七百戶
分屬思恩宣德間復從都督山雲奏以上林淥溪峒八

百餘戶益之正統間瑛以功陞田州知府仍管思恩州
事瑛欲兼管田州府與知府岑紹交惡安遠侯柳溥議
陞思恩為府又益以宜山八仙諸峒六百六十戶從之
尋改為軍民府瑛以府治遐邈議改於橋利又請置學
校立師儒增廣生徒比諸內郡焉時兩廣用兵多所調
發總兵董興檄瑛討賊帥黃蕭養破之瑛守柳慶又敗
峒賊韋公點於賓州瑛上首功四百五十餘天順元年
陞廣西參政改都指揮同知擢驃騎將軍都指揮使瑛

死子鑛襲三年違逆自縊以鑛弟鏐襲成化十五年鏐死子濬襲濬以兵力雄長弘治間屢寇思城果化上林都陽等寨攻陷田州逐知府岑猛俘其妻子婦女百二十九人都御史潘蕃疏其罪狀集兵進討濬敗死遷其家因議改銓流官以雲南知府張鳳為廣西右參政掌思恩府事正德七年增設鳳化縣治以流官諸奄猶未甚馴伏覃恩劉召相繼為變都御史盛應期遣官軍平之未幾而土目王受與田州目盧蘇合謀煽亂勢益猖

獮新建伯王守仁受命至乃一意招撫而檄受等破八寨賊為張其功因列思恩地為九土巡檢司管以頭目授王受白山司巡檢得比於世官矣又以思恩舊治瘴霧昏塞宜更之爽塏於是擇地荒田以建新郡割武緣止戈二里益之又議割上林三里而移鳳化縣治於其處蓋寓犬牙相錯之意嗣之者為林公富所議遷郡割止戈里俱如公指惟以三里當設衛而并鳳化縣裁之遂令府治益孤嘉靖十三年鎮安岑金寶詐岑濟子謀

并思恩守備高乾督九司征之誅金寶十六年鎮安又
糾衆謀亂參將沈希儀誘至柳州殺之其後九司日恣
所轄奪民不堪知府陳璜棄城而逃目把劉現廬回以
復土為名鼓衆煽亂副使翁萬達因有事安南計擒廬
回殺之招回九司從亂者三十餘人最後東蘭岑瑄詐
稱岑濬子起雲謀復土官卒為九司頭目所縛萬厯七
年督府吳文華謂九司日以驕黠編民甚少緩急難恃
奏割南寧武緣縣屬思恩自是思恩稱巨鎮矣 武緣

縣本漢領方縣地梁屬嶺山郡隋置武緣縣尋省入嶺
山縣屬鬱林郡唐武德間復置屬南晉州後屬邕州宋
景祐間益以廢樂昌封陵二縣地屬邕州元明因之至
萬曆七年始改今屬

何旺堡前隸上林止戈宋治平四年撥入武緣明萬曆七年置

何旺堡大鳴山脚設堡長領
土兵五十名防禦隸思恩

上映土州古蠻夸地秦

屬百粵漢屬交趾唐為夸峒宋置上映土知州世襲明

洪武間廢為峒崇禎十年復為上映土州隸思恩 西

隆州古日南國宋名安隆峒明永樂間置安隆長官司

岑姓沿襲後以嗣絕相爭

本朝康熙五年撫平之改

置西隆州設流官隸思恩

西林縣古百粵地秦漢屬

交趾宋置上林峒明改上林長官司崇禎間廣南土官

侵奪爭戰不休

本朝康熙三年勘定改置西林縣設

流官隸思恩

小鎮安古百粵地漢屬交趾唐置鎮安峒立宣撫司宋改為鎮安府立岑姓為

土府世襲明永樂間分其後裔岑志英管舊鎮安立為州隸鎮安土府統轄於思恩軍民府地近雲南久阻聲教
本朝順治十七年繳印投誠最晚未經具題不便循舊名故係以小鎮安仍隸思恩



粵西文載卷十一

欽定四庫全書

集部

粵西文載卷十二

詳校官庶吉士臣瑚圖禮

主事銜臣徐以坤覆勘

總校官庶吉士臣朱 鈐

校對官中書臣王 瓚

謄錄監生臣史映綵

欽定四庫全書

粵西文載卷十二

桂林府通判汪森編

志

土司志有序

張任

兩江谿洞舊為荒服唐太宗時諸夸內屬始置羈縻州
縣隸于都督府以其首領為刺史宋參唐制析其種落
大者為州小者為縣又小者為峒推其雄者為首領籍

民為壯丁以藩籬內郡其首皆世襲分隸諸寨總隸於
提舉元豐以後峒酋多寄內地納粟授大小使臣或敢
詣闕陳利害至借補閣職與帥抗禮為招馬官者尤與
縣相狎子弟有入邕州應舉者招游士多設耳目州縣
文移未下已先知之輿騎居室服食擬於公侯其州縣
雖曰羈縻然祖稅不供威令不行寨官非惟墮不舉職
且日走峒帥之門握手為市即提舉官亦不復威重與
之交關通賄其間有自愛稍欲振厲諸峒必共汙染之

使以罪去甚則醜焉故曰黷貨則玩玩則無震非虛言
已元以左右兩江羈縻州縣俱屬南寧帥府分司管轄
而上下相通姑息尤甚夸俗狃於讐殺往往侵盜邊境
莫之能制也我朝受命兩江土酋東泝交關西緣牂牁
際滇之廣南莫不納土歸款願貢方物恐後朝廷第因
舊疆稍稍增省置各府州縣其長吏令世世相傳諸佐
與屬並為銓才部有丞州有目削絕者始以流官代焉
大都矜彼歸正恢我包荒納土則受請示則遣令無頗

覆羈縻勿絕而已間有調發勝兵奉檄連伍解嚴還部
輕者賚文襁重者錫冠裳願屯種者與之膏腴且耕且
守所以馭諸酋者約束甚堅而綏柔亦備至矣間有桀
驁不逞時跳繩墨猶諄諄文告待其不悛然後加兵如
思恩之岑濬田州之岑猛泗城州之岑應岑接不數年
相繼夸滅甚則覆其宗殄其子孫矣夫夸俗剽悍如鷙
與狼急則相擊爭則相噬天性固然但彼既授簪纓撫
爵土力足以甞生殺財足以侈上供養尊處安令諸部

落莫敢仰視彼亦視中國之予奪為戚忻榮辱豈願其
子若孫中道而殄哉故華以夸為監夸亦自相監此前
事之師已後之議夸者謂太平諸夸土陋而兵微一有
不逞可更而置其勢甚易若思明田州諸司封疆褻於
內地士馬雄於近郊其制馭甚難欲稍倣賈生衆建之
議因其勢而瓜分之斯不亦却顧哉然而未易言也西
南土司與交州為鄰交人所以俛首頓顙不敢窺內地
者以土酋兵力之強足制其死命也若自弱其兵自撤

其障恐中國之邊患有甚於土司矣夫夸無常順亦無
常逆惟視吾馭之何若余觀往牒國初諸土官奉約束
一徵召惟恐後時正統以後浸淫桀驁視文告若土苴
則馭之得失異也國初以重典懲貪人人重自愛故威
令易行其後吏雜而多端中涓武弁視土官為外府而
墨吏以漁人收之即襲一職進一階未有不以賄行者
故土酋亦輕中國視若無人徵發不以時至擅攻殺無
虛日我一有警又不得已藉之為聲援我日益弱夸日

益橫如奉驕子養潰癰欲其不決裂不可得已昔胡端敏守太平而諸土酋畏之若神明愛之若慈母則馭之道得也夫豈獨太平然哉

右江土司志

採名
勝志

南丹州

東蘭州

那地州

忻城縣

永順長官司

永定長官司

鎮安府

上峽州

湖潤寨

歸順州

田州

思城州

上林縣

上隆州

泗城府

安隆長官司

上林長官司

程縣

奉議州

向武州

富勞縣

都康州

思恩府九司

南丹州在慶遠府城西二百四十里東抵河池界西抵貴州豐寧長官司南抵那地界北抵荔波界古蠻峒地也唐為羈縻州宋開寶初土官莫洪普內附元豐三年立為南丹州管轄諸峒蠻大觀元年廣西經略使王祖道欲急邊功殺土官莫公佖改南丹為觀州公佖弟公晟密圖報復焚寶積監尋廢觀州以公晟知南丹州兼

谿峒都巡檢使歷世承襲元至元十四年南丹牧莫大
秀內附迨後叛服不常惟羈縻之至正末莫國麒獻圖
納土命為慶遠南丹谿峒安撫使大德二年改慶遠路
總管府為軍民安撫司明洪武初莫金以土地內附授
知州世襲以流官吏目佐之仍隸慶遠府二十八年金
復叛詔征南將軍左都督楊文率師討平之因廢州置
南丹衛後以其地多瘴遷之賓州既而夸民作亂復置
州以金子莫祿為知州撫治之永樂十五年有以孟英

山開礦為言遣內臣督其事歲不過九十六金旋變錫
遂罷之祿死子禎襲正統間莫禎奏宜山諸縣盜賊出
沒因流官能撫良民不能鈐束蠻夸願假府職銜務將
谿峒諸蠻盡數殄滅上以示總兵官柳溥尋以禎軍功
擢慶遠府同知仍知州事禎死必昇襲必昇死無嗣弟
必勝襲成化十六年必勝率衆攻荔波縣殺民二千七
百有奇擄三千六百有奇總鎮諸臣俱事姑息置不問
必勝死子繼泰襲繼泰死以弟繼恒襲繼恒死以繼泰

之子楊襲鄰縣思恩與州地犬牙相錯楊欲蠶食之興
兵侵茅灘界築二堡於普又六傳川山三疇復築四堡
民愬之院司委官逐退楊猶桀驁不服嘉靖元年都御
史張嶺委知府王顯高都指揮戚綱詣堡諭以威令楊
始懼盡掣目兵毀其堡楊調征田州卒於軍無嗣以繼
泰弟繼華之子振亨襲振亨復縱目兵莫人蠻等越界
築堡被官兵勦退振亨死子維武襲維武死子從時襲
從時死子之厚襲之厚故桀黠時出剽寇萬厯四年土

豪秦廷廣等又將荔波縣地獻與之厚隨統兵侵掠督臣劉堯誨撫臣張任以聞兵部議還其地萬曆八年之厚燬董界官堡據喇立喇歌董界翁隆吉利喇離上下七村督臣委指揮威秉忠立碑定界後稍帖然

東蘭州在府城西南四百二十里東抵永順司界西抵泗城界南抵田州界北抵那地界古百粵地唐為羈縻州隸邕州都督府宋有韋君朝者居文蘭峒為土夸長依綏南砦家焉傳子宴闡崇寧五年內附因置蘭州以

宴開知州事俾世其官元改為東蘭州韋氏世襲如故
洪武十二年韋富撓遣其家人韋錢保詣闕上故元所
授印貢方物錢保匿富撓名以為已物因以保知東蘭
州既而保徵暴急民不堪命借富撓作亂廣西都司討
平之因言其故於是執錢保罪之以州隸慶遠府仍歸

韋氏世襲

舊通志云土官知州韋氏自謂漢丞相賢之後至宋有韋君朝以事編管廣南西路之賓

州遂起家至富僮僕恒逾數百人值文蘭峒有苗叛詔伐之君朝應募為義兵長率子弟家丁徃征之所向克捷羣酋咸服遂徙居文蘭峒為土酋之長依綏南砦於文州家焉傳子宴開崇寧五年錫印知蘭州紹興二年

以韋天曉嗣之後相傳襲元至元間有韋德隆者襲祖官適大察罕伐蠻獠深峒素無人迹可通德隆以兵臨之峒獠率降自後子孫世修其貢土官底簿云韋錢保世襲東蘭知州洪武十二年歸附授知州十八年錢保死子萬目二十八年襲萬目患疾子質永樂五年襲質死子濟民二十二年襲濟民死無子錢保孫爵應襲宣德七年被首賊黃文進等殺死子翫正統元年襲翫死子興宗幼伊叔韋善偕職景泰四年興宗年長奏襲興宗死子祖鉉十一年襲老疾子正寶陣亡孫虎臣應襲病死子起雲幼病嘉靖十二年以虎臣弟虎林襲通志云虎林頗知文墨由是官族兵目皆衣漢衣服嘉靖十年虎林有疾乃以起雲襲起雲死子應龍襲應龍告老廢長子立幼子文韜弟應虬糾南那鄰兵攻之萬曆十四年文韜死頭目陳星陳蒙等欲立其幼子文略圖專擅乃四應龍于武篆殺家丁執官男文奎藏匿州印參議陳性學計取應龍文奎收其印信星蒙遂據寨

叛因調兵擒陳星等戮之以文奎襲先是河池州三旺
六里為東蘭所據督臣劉堯誨奏聞下兵部議以地歸
河池而占據如故至萬厯十六年文
奎感再造恩且懾威令始將地退還

那地州在府城西南二百四十里東抵河池界西抵泗
城界南抵東蘭界北抵南丹界古百粵地唐為谿洞之
地名曰那地宋熙寧初土人羅世念來降因授官世襲
崇寧五年諸蠻納土遂置地那二州以羅氏世知地州
大觀初析地州建隆縣置孚州宣和中孚州廢元仍為
地那二州其酋長世修常貢洪武元年羅黃貌歸附詔

省那入地改為那地州錫印授黃貌為土官世襲知州

以流官吏目佐之

舊通志云那地土官羅姓舊為谿峒首長本唐撫水州所轄歸化縣西境

地世以蒙氏為帥宋大中祥符九年討平之自是不復為寇熙寧初土人羅世念又作亂詔遣兵討之未入境而世念率其徒來降因拜官厥後子孫傳襲洪武元年羅黃貌歸附改為那地州二年州隸慶遠府土官底簿云七年授黃貌知州九年被利州知州岑志良殺害劫去印信十六年子寶赴京重錫印授知州十七年被賊殺死十九年子捷襲永樂十年捷死子志通襲志通死正統五年子文愈襲老疾成化十三年子武桀襲患病正德五年子廷醴襲十五年從征古田逾年勞疾昇歸尋死子世爵襲

忻城縣在府南一百四十里東抵馬平界西抵永順界

南抵賓州界北抵宜山界古百粵地唐置芝州天寶初
併綜歸思忻芝五州改為忻城郡屬嶺南道後復為芝
州宋慶厯間廢因置忻城縣改隸宜州元仍舊以土官
莫保為八仙屯千戶洪武初設流官知縣罷管兵官籍
其屯兵為民莫氏遂徙居忻城界宣正以後猖獗狂悖
知縣蘇寬不事事而獐老韋公泰等舉莫保之玄孫敬
誠為土官寬為申監司具奏授敬誠世襲知縣時一邑
二令權不相統流官徒擁虛名耳繼寬者益不能振諸

錢穀甲兵盡入土官掌握流官知縣恒佩印儼居府城

弘治間總督鄧廷瓚奏革流官而土人韋涓為內監官

用事陰主之始獨任土官

舊通志云成化二年敬誠死子魯襲弘治十年革流官以

魯為土官知縣魯死子繼清未授官死正德三年子廷臣襲

永順長官司在府城西南六十里舊為宜山縣古陽述

昆等鄉永泰外里吉利中里夸江端簡緣河思農等里

之地

永定長官司在府城東南八十里舊為宜山縣歸善洛

三等鄉洛南洛富洛東洛西下里及莫往峒落分路一
都博等里之地正統六年因蠻夸弗靖司土者莫能控
禦老人黃祖記與思恩土官岑瑛交結謀割地歸之思
恩因謀於知縣朱斌備時瑛方雄兩江大將多右之斌
備亦欲藉以自固遂為具奏將地改撥岑瑛管轄土人
嗷嗷不服韋萬秀以復地為名因而倡亂成化二十二
年覃召管等復亂屢征不靖弘治間委官撫之各賊願
取前地別立長官司以治都御史鄧廷瓚為奏置永順

永定二司各設長官一副長官一以鄧文茂彭訪韋槐
韋朝和等授之亦皆宜山洛日洛東諸里人也自是宜

山東南棄一百八十四村地宜山西南棄一百二十四

村地

舊通志云永順正長官鄧文茂世為宜山洛目里人先以獍民保授懷遠鎮土巡檢弘治五年置長

官司以文茂擢授正長官六年給印十二年死子纓襲
嘉靖三年纓為劇賊韋召假所殺奪其印子文毓未襲
先死以孫幃襲副長官彭訪慶遠衛都指揮彭英姪孫
附宜山縣下里民籍初英撫安述昆諸夸恩信素孚其
地故訪亦為獍獍所信服弘治五年置長官司保授副
長官六年任子季濟未襲先死孫錡保襲正德七年以
軍功冠帶十一十四年屢率所部從官軍勦賊永定
正長官韋槐其先宜山縣洛東里人弘治五年置長官

司槐以獐民舉授正長官六年給印正德初死以子寶襲副長官韋朝和其先宜山縣洛西里人弘治五年置長官司朝和以獐民舉授副長官六年任正德初死子陳保襲未授官死十四年以韋建保襲按二司俱弘治五年都御史閔珪同太監王敬伏羌伯毛銳具奏開設名勝志則云鄧廷瓚是九年間總督當是此時纔定

鎮安府古百粵地東抵向武界西抵交趾界南抵都康界北抵奉議界漢屬交趾郡宋於鎮安峒建右江鎮安軍民宣撫司元改鎮安路明洪武二年以舊治僻遠移建廢凍州改為府授土官岑天保知府設流官首領佐之天保死志綱襲洪武三十五年向武知州黃世鐵侵

奪高寨等地督府遣兵奪之以其地屬鎮安

舊通志云土官岑姓

元為鎮安路總管明洪武元年岑天保歸附二年錫印授本府知府世襲詔進朝列大夫二十八年天保死子志剛襲進中順大夫永樂元年患病子永壽署事八年襲老疾正統九年子元氣襲元氣本永壽妾梁所生依妻常撫養立為嫡次妾農生祖德元氣既襲祖德念及因母蒙黨構交趾並廣南諸兵攻府執元氣并子璧及母常俱殺之永壽白于總兵武毅為聞之朝遣官按治成化二年弟元全襲以軍功錫冠帶進中順大夫十三年元全死子鉅襲授中順大夫弘治十年上映峒元鉅死子金襲金死子塗襲塗死子真實襲

為州屬鎮安路明初為峒隸鎮安府土官許朝卿崇禎

十年復為土州

湖潤寨巡檢司始祖岑元全屬鎮安

府傳至岑穩隆慶三年調征廣東陣亡子壽松襲

歸順州舊為峒隸鎮安府永樂間鎮安知府岑志綱分
其第二子岑永福領峒事傳子瑛屢率兵報效弘治九
年都御史鄧廷瓚奏歸順峒舊為州治洪武初裁革今
其峒主岑瑛每效勞于官乞設州治授以土官知州從
之仍增設流官吏目一員瑛死子璋襲復從璋奏以州
改隸布政司璋多智略田州土官岑猛以不法獲譴都
御史姚鏌將舉兵璋猛婦翁也督府慮璋黨猛召都指

揮沈希儀問計希儀雅知璋女失寵恨猛因請假旬日
部下千戶趙臣雅善璋希儀召趙臣以計紿之璋強臣
留傳舍而亟遣人馳希儀所備陳猛反狀恐波及願設
計自效希儀許之猛子邦彥守工堯隘璋佯遣兵千人
助邦彥曰聞天兵至將以姻黨誅我今日義同死不忍
坐視此皆精兵可當一面者邦彥欣納之璋復遣人潛
告希儀曰謹以千人內應矣時田州兵殊死守戰諸將
軍莫利當隘者希儀獨引兵當之約戰三合歸順兵大

呼曰敗矣田州兵驚潰希儀麾兵乘之斬首數千級邦
彥死焉猛聞敗欲自經而璋先已築別館使人請猛猛
倉皇不知所度遂挺身佩印從璋使走歸順璋詭猛為
猛草奏促猛出印實封之璋既知猛印所在乃鳩殺猛
斬其首并府印函之間道馳詣軍門為讒言所阻竟不
論功璋死次子璫襲璫從征黎賊卒於軍

田州土官岑氏自以為漢武陰侯岑彭後不知所攷其
地東抵南寧界西抵泗城界南抵奉議界北抵東蘭界

漢屬交趾唐隸邕州宋始置田州屬邕州橫山寨元置田州路軍民總管府明初改為田州府省來安府入焉

洪武元年土官岑伯顏以二路歸附因錫之印世襲土官

底簿及舊通志云田州岑氏元以來有岑翔岑瑛岑雄岑世興岑也先岑伯顏者相繼為田州及來安二路總管明洪武元年岑伯顏歸附伯顏又名堅二十年改路為府給印授堅田州知府長子永通授上隆州知州二十六年堅死永通襲知府永通病永樂三年子祥襲祥死十七年子徽襲被岑永寧毒死洪熙元年徽子紹襲紹於景泰二年令總兵武毅保庶子鏞替職紹死鏞嫡長兄鑑興兵逐鏞鏞寄迹廣西城內三司會勘鑑係嫡子應襲景泰四年鑑襲鏞仍令冠帶總兵官聽調鑑死無嗣鏞襲鏞死子溥成化十一年襲數傳至

溥弘治三年思城州土官岑欽泗城州土官岑應攻敗
田州共逐之都御史秦紘逐欽以溥歸府溥二子長獠
次猛獠以失愛殺溥土目黃驥李蠻共殺獠猛方四歲
驥護之赴梧州告襲歸至南寧李蠻遣兵來迎驥恐蠻
分已權殺其人蠻率兵繼至誣蠻為變請官護送乃檄
思恩知府岑濬以兵衛猛濬方豪舉驥賂濬挾猛分地
界驥北至田州李蠻拒不納驥復以猛奔思恩十一年
都御史鄧廷瓚檄濬歸猛濬不從尋以兵徵之濬始釋

猛督府納之田州與濬構釁濬集泗城東蘭州兵陷田
州猛走免都御史潘蕃討濬誅之改流官降猛福建平
海千戶以參政謝湖掌田州府事猛遷延不行及湖至
陳兵自衛挾改府佐湖受餽代請都御史陳金劾之下
錦衣逮湖正德初猛賂太監劉瑾矯詔以猛為田州府
同知湖僅降職猛撫遺民兵威復振稍稍侵旁郡自廣
復興軍功序遷知府為重乃言督府征調願先鋒而督
府旗校至田州者猛率厚賂結驩譽猛者籍甚會江西

華林峒賊反都御史陳金檄猛從征猛兵沿途剽掠民
皆徙村避之為之謠曰華林賊來亦得土兵來死不測
黃狐跳梁白狐立十家九家邏柴棘頃之賊平金疏猛
功稍遷指揮同知猛復恃其兵力凌轢諸峒十三年襲
龍州十六年襲泗城州殺土官岑接自是輕視中國糧
餉不供嘉靖初思恩府頭目劉召叛參將李璋調猛合
攻猛子邦彥逗遛後期以致兵敗遂有譖言都御史盛
應期持此恫猛冀墨其貲猛顧出不遜語應期恚恨疏

猛旦暮必反狀請征之未報應期去都御史姚鏌代之
鏌雅知猛無反心而鏌子淶亦以書諫請勿征時巡按
謝汝儀與鏌有隙廉得淶書誣淶納猛萬金鏌惶恐乃
再請征猛遂發兵八萬分道並進猛長子邦彥守工堯
隘指揮沈希儀擊斬之諸軍繼入猛懼謀出奔而歸順
知州岑璋猛婦翁也其女失愛屏居璋欲藉此報猛乃
誘猛走歸順鵠殺之先是猛三子邦彥敗死邦佐出後
其族武靖知州邦相亡走邦彥側室子芝祿匿民間姚

鎮見岑氏單弱計田州可遂滅乃陳疏請流官治田州
從之未幾土目盧蘇糾思恩土目王受等挾邦相反兩
江皆震御史石金劾鎮罔上寡謀利圖田州不可得并
思恩失之上大怒責鎮落職起王守仁總制軍務守仁
至蒼梧時諸夸聞先聲皆股栗聽命而守仁顧益韜晦
以明年至南寧使人約降蘇受許諾而以精兵二千自
衛守仁所愛指揮王佐門客岑伯高使人言蘇受以萬
金丐命蘇受大恚守仁侍兒知佐等謀夜告守仁守仁

達旦不寐使人語蘇受母信讒言蘇受疑懼未決言來見時必陳兵衛守仁許之蘇受復言軍門左右祇候須盡易以田州人守仁又許之蘇受入軍門守仁數之論杖一百蘇受不免甲而受之杖杖人又田州人也諸夸皆驚莫測守仁意守仁乃上疏言岑氏世效邊功猛獨詿誤觸法雖未伏誅聞已病死治田州非岑氏不可請降田州府為州治以岑邦相為判官分設土巡檢以盧蘇等為之以殺其勢添設田寧府統以流官知府以總

其權守仁薨都御史林富反其政上言田州不必再設
府治以騷遠夸朝議許之以岑邦相為判官分設十八
土巡檢司以張祐充副總兵鎮其地時邦相纔十五六
祐兒子畜之而盧蘇自矜興復功威行部中邦相擁虛
位而已遂有隙十一年祐任滿將求代邦相治具供帳
僅值二百金祐怒遂以他事撻邦相蘇遂與祐比批根
邦相時邦彥之子芝齧齡矣祐搜得育之邦相欲購殺
之祐不果代得免祐以西山之役從征置芝衣篋以行

邦相復供帳甘言謝祐行毒酒中祐以芝奔梧州都御史陶諧亦兒子畜之十二年祐發毒死十三年盧蘇劫諸土目弑邦相乃賂諧言邦相病死無後芝當立諧遂縱芝歸田州寢其事不問于是猛仲子邦佐爭立而鎮安岑真寶泗城岑施東蘭韋起雲那地羅廷鳳諸土舍咸憤盧蘇以僕弑主助邦佐攻田州蘇僅以身免求救於其壻歸順土舍岑巘乘虛擣鎮安鎮安土舍岑金寶大敗兩江大駭會諧憂去都御史潘旦蔡經相繼代之

皆如諧議言邦相不孝因衆怨致殺朝議置蘇不問以
芝襲知州事芝死子太壽襲太壽死弟太祿襲太祿死
土官男岑懋仁襲萬厯二十一年田州頭目黃闕戍周
安鎮修怨于州目盧佑以數十人晝入州斬盧佑而出
州人畏其勇莫敢追闕謂州易與率千人掩州之武峒
擄男婦數百聲言攻城奪印田州大恐羽書馳至副使
周一經會參戎汪弘罷圖之弘罷潛師夜出至鎮闕逆
戰敗望古鉢山以遁兵乘之追及石崖藤斬闕宥其脅

從者田州始平

思城州唐時置宋元仍舊明因之洪武二十六年知州岑烈死絕景泰四年奏保本府土官知府岑紹次男岑欽任知州岑欽與田州土官岑溥同宗弘治間岑溥被頭目黃明所逼逃之思恩府欽會兵討之誅黃明并其族屬後溥與欽交惡欽攻奪田州府逐岑溥殺五十餘家督臣委官送溥子猯入府復為欽所遏都御史秦紘檄兵攻之欽走遣官諭之欽死孫桂佩襲弘治末思恩

府知府岑濬亂攻田州桂佩投於濬被誅印失今無襲地為田州所併

上林縣在田州東三百八十里宋置隸橫山寨元屬田

州路明因焉洪武二年土官黃嵩歸附授世襲知縣以

流官典史佐之嵩死子伯慶襲

土官底簿云上林黃氏元末黃京襲知縣京死

子自誠幼令叔廓署事洪武十年自誠襲三十二年自誠死子嵩襲永樂十六年嵩死子伯慶襲伯慶死子澄署事天順三年澄死弟濟襲成化十三年濟死子瓊襲

上隆州在田州城北八十里宋隸橫山寨元屬田州路

洪武初以知縣岑永通管州事成化間移置武靖州土官

底簿云上隆知州岑永通係田州知府岑堅子洪武元年歸附二年授知州二十六年堅死永通係長子襲父田州知府長子祥在府聽承府事次子瓊年幼令房叔岑貴撫育瓊在州協同流官辦納稅糧瓊後長進貢告授前職永樂四年准授知州瓊死母陳氏宣德四年襲後陳氏死絕景泰四年總督等官保本府已故上官知府岑紹庶次子鐸授知州鐸被祖母岑氏奏其姦嫂謀殺親兄岑鑑下廣西布政司獄成化二年都督和勇等奏稱斷藤峽山極險峻各賊哨聚為患看得岑鐸所犯伊母妻奏訴並無姦嫂殺兄情由伏乞以地方為重宥其可矜疑之罪令其復任上隆知州遷來斷藤水路中間地方碧灘開創衙門把截道路兵部議覆准碧灘立武靖州隸潯州府岑鐸授武靖州土官知州正德三年鐸死子玘襲

泗城府東抵東蘭界西抵上林長官司界南抵田州界
北抵永寧州漢屬交趾郡宋置泗城州隸橫山寨元屬
田州路洪武初土官岑善忠歸附授世襲知州以流官
吏目佐之改隸布政司自宣德七年岑豹襲職桀驁亡
狀迫逐程縣流官知縣與上林長官司及田州土司相

仇殺無已時亦互有勝敗云

土官底簿云元時有岑恕
木罕者授宣命散官武略

將軍來安路總管子善忠襲洪武初欵附授來安府知
府五年被宗叔岑堅排陷大軍收捕已沐恩宥總兵官
江夏侯將來安府與田州府知府岑堅兼守禦事本府
衙門不曾革併七年復錫印授泗城知州善忠死子振

襲振死子瑄永樂元年襲瑄死無子妻盧氏署事二十二年詔授女官知州宣德七年瑄弟琮之子豹已長令襲豹死子應成化十四年襲弟接與恩城土官謀殺之無子接保襲嘉靖元年田州岑猛糾諸州兵攻殺以接之孫施襲

本朝順治十五年

知州岑繼祿從征滇黔有功

改為軍民府

安隆長官司東抵泗城界西抵雲南界南抵上林長官

司界北抵貴州宣慰司界漢屬交趾郡元為泗城州地

明永樂間置長官司以泗城州土官岑善忠次子子德

授長官撫其夸民

舊通志云岑氏舊為安隆峒酋長子德授長官死子岑高岑聰繼襲生子

永斌永網聰死永斌襲永斌死子文瓊襲弘治四年泗城岑接攻殺之以永網長子文勝襲文勝死無嗣弟文

昂襲正德三年岑接復因安隆叛目黃羅黃昱等以兵攻司殺文昂擄其妻殺其次子顯庸州農排等逐殺黃羅以文昂長子世榮保襲接又遣黨目黃琚兵劫世榮及印入泗城琚因據羅素花匠二甲地督府屢遣官持節徵之不聽嘉靖二年接為諸州兵攻死司治為頭目陸興管印追勘未出有岑世華者稱係岑族欲襲委官覈之

上林長官司東北俱抵泗城界西抵安隆長官司界南抵雲南界漢屬交趾郡宋元號上林峒屬泗城州明因焉永樂間置長官司以泗城州土官岑善忠三子子成為長官撫其夸民

舊通志云岑氏舊為上林峒酋長子成授長官死子志威襲無嗣弟志傑

襲天順八年泗城岑豹以兵攻司殺志傑奪印而據其地畀頭目黃傑領之志傑子宗蔭出奔他州不知所終豹盡殄其族惟岑瑤一人脫去弘治六年豹之子接復誘瑤至泗城給以歸印尋鳩殺之復畀黃傑之子富領後接與傑有隙富移居貴州永寧州羅問寨印為接所據督府屢遣官追不聽嘉靖二年接為諸州兵攻殺司治為頭目梁謝管印為黃舍所收有岑楊者稱係岑族欲襲委官覈之

程縣在州城東

北舊號程丑莊明初歸附隸泗城州洪武二十一年改為縣編戶一里後改屬慶遠府尋復隸泗城州改流官知縣正統間為岑豹所逼棄官遁去典史攝印旋亦懼害豹遂奪其印吞併縣治事聞屢遣官督之歷岑應岑

接父子凡七十餘年不服嘉靖元年接為諸州土官攻殺督府遣官按問徵縣印貯於公帑以俟處分今僅存荒土泗城南丹那地俱欲爭之時治兵相攻云

奉議州東西北俱抵田州界南抵鎮安界漢屬交趾宋置州初屬靜江軍節度使後屬廣西經略安撫司元屬廣西兩江道宣慰司洪武五年省入來安府七年復置

詳下向
武州

向武州東北抵田州界西抵鎮安界南抵鎮遠州界漢

屬交趾宋置州隸橫山寨元隸田州路洪武二年土官

黃志威歸附授世襲知州

土官底簿及舊通志云向武黃氏在元有黃朝用黃仕太

歷知州事黃志威陞路總管明洪武六年志威招撫奉議等州一百二十七處夸人歛附先是且從大軍討來安路叛賊岑郎廣七年以功改奉議州世襲知州兼向武州及富勞縣事生子二長世鐵次世或二十八年志威死世鐵襲與其子嗣隆皆以逆誅罷奉議州為衛向武州為軍民千戶所世或見世鐵與鎮安府爭地大軍征勦懼逃泗城州潛住三十二年總兵官招回仍原管地方三十三年罷衛所復置州直隸廣西布政司三十五年以世或任向武州知州兼管富勞縣事子嗣昌嗣謙永樂十三年世或死嗣謙襲嗣謙死無子嗣昌之子宗蔭襲任奉議知州帶管向武宗蔭死子文昶襲文昶死景泰四年子文顯襲成化十五年文顯死無子姪瑛

襲弘治四年瑛死子彥壽襲彥壽生子仲金

富勞縣在州北三十里元置

隸向武州明洪武間為蠻獠所據三十五年復置仍隸向武州永樂初省武林入焉

都康州東南抵龍英界西抵鎮安界北抵向武界漢屬交趾宋置州隸橫山寨元屬田州路以土官馮姓者為酋長洪武初夸獠作亂據州馮原保出奔尋撫還其子進福以安集民後置州以進福子斌世襲知州設流官吏目焉

土官底簿云都康馮氏元末馮大英任知州大英死子德高襲兼鎮邊萬戶德高死子原保襲

洪武元年被富勞土官黃世威占奪本州原保奔鎮安
死子進福流落鎮安不能歸後大軍勦捕開設奉議州
軍民衛所總兵官招回三十五年襲職永樂九年進福
死子斌襲正統元年斌死子智洪襲天順三年智洪死
子哲襲成化十三年哲死無子以叔智海襲智海
死子皓襲皓征賊為流矢所傷告疾以子壹保襲

思恩府九司嘉靖六年新建伯王守仁撫叛目既平思
恩議設九司巡檢以分領之 興隆司在府北六十里

巡檢韋貴嘉靖七年授冠帶理司事其地視諸司獨廣
那馬司在府北五十里巡檢蘇闕嘉靖七年授職闕
故絕以白山司頭目黃理署司事理故子黃賜由府學

廩膳襲以征南賴功陞授指揮僉事賜故子如金襲如
金告休子中通由府學生員襲 白山司在府北六十
里巡檢王受故為思恩亂酋新建伯曲貸之且授以職
及其子孫 定羅司在府西一百三十里巡檢徐吾嘉
靖七年授職 舊城司在府西北一百五十里巡檢黃
石嘉靖七年授職 下旺司在府東北七十里巡檢韋
文明嘉靖七年授職 安定司在府東北三百二十里
巡檢潘良嘉靖七年授職 都陽司在府西北一百五

十里巡檢王留嘉靖七年授職留故絕以頭目黃羅署
司事 古零司在府東八十里巡檢覃益嘉靖七年授
職益故子文顯由府庠生襲文顯告休子桂由府庠生
納例授副千戶未襲子大欽襲攝司事

左江土司志

武靖州

歸德州

果化州

忠州

下雷州

太平州

恩城州

安平州

萬承州

上下凍州

鎮遠州

都結州

全茗州

茗盈州

思同州

龍英州

結安州

佶倫州

思明州

羅陽縣

陀陵縣

思明府

下石西州

江州

羅白縣

利州

龍州

思陵州

憑祥州

武靖州在潯州府城西二十五里地名碧灘成化三年

總督韓雄以其地為藤峽要害立州治時上隆州土官

岑鐸犯大辟下獄奏宥其罪遷其部兵二千人世掌武

靖州事設流官吏目一員尋復移置崇姜大宣二里間
為蓼水北岸乃紫荊竹踏梅嶺大沖諸山要路也地廣
土沃袤連大同鵬化足以控制諸蠻岑鐸死子玘無嗣
部兵漸散正德十六年議以田州府岑猛次子邦佐繼
之時僅有部兵五十人嘉靖五年猛亂安置邦佐漳州
七年總督王守仁撫平田州奏復邦佐知州事邦佐益
無忌憚占管狼家為部落以睚眦怨嗾諸猺攻墮營壘
目兵死者二百餘人時左副使翁萬達參議田汝成言

之督府數邦佐諸罪狀謂宜逮治削職以武靖州改為
武靖千戶所推賢能軍職一人掌管以平南桂平貴縣
三縣狼家屬之提調編為保甲其於計便督府不從按
今邦佐之嗣已絕潯州府通判權知州事狼兵歸之桂
平平南貴縣三縣俱如翁田二公議

歸德州在南寧府城西二百五十里東西北三面俱抵
思恩界南抵隆安界宋熙寧中置隸邕州元屬田州路
洪武二年土官黃隍城歸附授知州以流官吏目佐之

土官底簿及舊通志云歸德黃氏元末有黃志隆襲知州志隆死子勝安襲勝安死子碧方一歲弟勝聰襲洪武二年授知州十三年交印與勝安妻岑氏收管勝聰棄職弟勝全署事十九年自願遜職與碧二十年碧襲永樂三年碧死子高襲景泰四年高死子宇管事成化十三年宇死子通襲通篤疾男克顯告襲正德四年克顯死子文正襲

果化州在府城西北四百餘里東抵隆安界西抵上林界南抵太平界北抵思恩界宋始開置果化州隸邕州

元屬田州路洪武二年土官趙榮歸附授世襲知州以

流官吏目佐之

土官底簿云果化趙氏洪武二年授趙永全知州二十六年永全死子榮宗襲

永樂四年隨兵征進被藥箭傷七年子英襲英亦被藥箭傷正統元年子勉襲又患箭傷成化二年子騰冠帶未襲十三年按已上二州俱弘治年為田州所侵輒因騰死弟勝襲改隸南寧

忠州在府極西宋建隸邕州元屬思明路明因之土官黃姓其先江州之族有黃威慶者率子中謹歸附授威慶江州中謹忠州各世襲知州設流官同知吏目佐之

土官底簿云黃威昇洪武初授忠州知州因阻詔書十五年收捕絕滅土民郭保等告保黃中謹二十三年襲患疾永樂九年子智洪襲洪熙元年智洪死弟智勝襲智勝死子溥成襲患病成化十三年子總襲弘治十三

年懿死子瑚襲
瑚死子廷玉襲

數傳至黃賢相先是有四峒者介于南

寧思明忠州兩州之間思明忠州屢肆占奪嘉靖間副
使翁萬達議改峒名四都隸南寧地方稍定隆慶三年
冬思明府土官黃承祖奏取四都地賢相遂爭之擅立
總管諸名目分兵數千戍守因縱令剽掠村落為禍甚
烈僉事譚惟鼎謀之方伯郭應聘應聘曰是可間取也
永康縣典吏李材者有謀略時署遷隆寨巡檢鄰忠州
惟鼎屬之以寨人覃惠內及材子夢辰潛入州中數往

來貿易盡得其親近狀態重賞間之其部下頭目傲思
蒙裕輩苦賢相虐願內應惟鼎密為手書諭二十四村
及四寨頭目程秀等令號召鄉兵擒獻賢相諸所蓄積
金穀器物悉聽自取而遷隆峒土官黃一元者素善賢
相惟鼎度賢相必求救一元責之尤謹計既定惟鼎令
材等集兵三千有奇擁迫近地內兵遙望之以為官兵
至爭取財寶馬匹四散遁去賢相勢窮挈印奔四寨四
寨村老就賢相語曰官家逮主甚急當詣官聽理賢相

欵欵泣下自取孔雀血入酒飲不死材督諸鄉兵追至會黃一元兵亦至遂擒賢相及州印以督備指揮吳世勲鎮四都都民復業如故賢相斃于獄議設流官不果督府奏以州屬南寧令州印給賢相子有瀚襲

下雷州在郡極西東抵龍英界西抵交趾界南抵安平界北抵湖潤寨宋元為下雷州明初印失廢州為峒在湖潤寨屬鎮安府至峒長許永通調征有功始給冠帶傳許世烈許國仁繼襲峒事嘉靖十四年得獲舊印國

仁子宗蔭襲宗蔭父子屢立戰功四十三年改屬南寧府宗蔭死子應珪襲萬曆十八年以地逼交南奏陞下

府宗蔭死子應珪襲萬曆十八年以地逼交南奏陞下

雷州降印授應珪土判官設流官吏目佐之
太平州在太平府治西北八十里東抵左州界南抵崇
善界西抵安平界北抵養利界舊名瓠陽為西原農峒
地唐為波州地宋置州隸太平寨元隸太平路明因焉
洪武元年土官李以忠納土歸附授本州知州設流官
吏目佐之

舊通志云太平州其先有李維屏者至元間陞本路總管明洪武元年李以忠歸附二年

授知州以忠死子圓泰襲患病子威敬護印三十三年
威敬死無子弟鐸襲鐸死子穀年幼宣德七年出幼襲
患病景泰五年子瑤替職天順三年襲成化十五年瑤
死子琬襲初琬娶妻岑生琛妾王生丹王妖媚譖琛欲
謀殺之以立己子由是琬疾琛誣以不孝琛覺亡之安
平依婦翁李禎七年琬奉調徂征攜王氏寓橫州淫于
市井凡五六十人醜聲大著琛聞欲發其事于琬王益
忿恨復誣琛悖逆琬因具牘申白當道按覈之而王果
淫迹敗露乃坐以罪出之琬亦自悔乃令琛回州理
事未幾琬復誣琛不孝牘上總督鄧公移檄責之

恩城州在府治西北一百里東抵養利界南抵太平界
西抵安平界北抵下雷州界亦西原農峒地也唐置州
隸邕州宋分為上思城下思城二州隸太平寨元至正

間仍併為一州明因焉洪武元年州酋長趙雄傑歸附

授世襲知州以流官吏目佐之

土官底簿云趙斗清世襲恩城土官洪武元年

歸附授知州十年斗清死子雄威襲二十九年雄威死無子弟雄傑襲雄傑死子志顯護印亦死永樂十六年弟志暉襲志暉死子福惠襲惠病成化二子子存宣襲征進染病弘治十年子忠順襲忠順死子明襲明死子鑑襲舊通志云趙氏世為思城州酋長洪武元年歸附二年錫印改州曰恩城

安平州在府治西北一百里西抵龍州界東抵思城界

南抵太平界北抵交趾界舊名安山為西原農峒地唐

置波州宋皇祐間析為安平州隸太平寨元隸太平路

明因焉洪武初土官李郭祐歸附授世襲知州以流官

吏目佐之

土官底簿云李賽都土官李郭祐子洪武元年歸附二年授知州二十一年賽都死子貴

襲永樂四年征進安南被藥箭傷九子顯襲十六年被太平知州李鐸興兵殺死二十一年弟華襲殘疾子森襲森死孫璘襲弘治十年璘死子

禎襲正德元年禎患風疾子源襲

萬承州在府治東北一百五十里東抵養利界西抵龍

英界南抵思同界北抵陀陵界舊名萬陽為唐置萬承

萬形二州隸邕州宋省萬形入焉隸太平寨元隸太平

路明因之洪武初土官許郭安歸附授世襲知州流官

吏目佐之永樂間征交趾死于軍子永誠襲

土官底簿云許祖俊

世襲萬承土官洪武二年歸附授知州祖俊死子郭安襲永樂四年從征安南與弟郭泰俱失陷九年子永成襲正統五年永成死子奎襲景泰元年從征風疾子榮宗襲成化十三年榮宗死子瑤襲瑤死無子弟瑜未授官死以子世雍襲亦死無子乃以榮宗之孫世忽襲

上下凍州在府治西二百二十里東北抵龍州界西南抵交趾界舊名凍江宋置凍州隸太平寨元分上凍下凍二州隸太平路尋合為一隸龍州明隸府洪武元年土官趙帖從歸附錫印授世襲知州以流官吏目佐之

帖從死子福瑀襲永樂四年征交趾死於軍

土官底簿云趙帖從

世襲土官父清任前授龍州萬戶府元帥兄帖堅前授萬戶府萬戶洪武元年歸附二年龍州差帖從齎貢赴京朝覲將帖從除授太平府上下凍州知州帖從死子福祥襲被人射死弟福禹襲永樂四年從征安南失陷七年子慶昌襲慶昌死弟慶隆襲慶隆死無子以伯福高子禮保襲間又死天順六年禮子廣勝襲患疾成化十三年子世真襲世真死子文興襲文興死子元恩襲

鎮遠州在府治東北二百八十里東抵侏倫界西抵向武界南抵結安界北抵果化界舊名古隴宋置州隸邕州元隸太平路明因焉洪武初土官趙勝昌歸附授世

襲知州以流官吏目佐之

土官底簿云趙昂傑鎮遠世襲土官洪武三年授知州二

十六年昂傑死子勝昌署事永樂三年襲七年被趙志能父子殺死子得茂八年襲宣德八年得茂死子德興襲征傷有疾正統十一年子富穀襲富穀死子暹方襲暹方死子昊未襲死子廷鈺襲生子帥球

都結州在府治東北三百三十里土官農姓洪武初內

附授世襲知州設流官佐貳與鎮遠等州例同

土官底簿云農

應廣前元任都結知州死子武高洪武三年授知州武高死子威斌署州事二十九年被佶倫州土官馮萬傑謀殺絕嗣永樂元年弟威烈襲威烈死子永昌未襲死宣德八年弟永隆襲景泰四年永隆死子得安襲得安死子富穀襲富穀死子廣寧襲廣寧死子惠忠襲惠忠死以嫡孫惠政子福高襲

全茗州在府治北一百六十里東抵茗盈界西抵龍英
界南抵龍州界北抵萬承界舊名連岡為西原地宋置
隸邕州元隸太平路明因馬洪武初土官許添慶歸附
授知州以流官吏目佐之

土官底簿參舊通志云許武興世襲全茗土官洪武二年

授知州武興死弟武明襲武明死無子以叔添慶襲永樂元年添慶死子武堅襲景泰四年武堅死孫均玉襲成化十三年均玉死子勝安襲勝安死無子以姪榮高襲生子德瑛

茗盈州在府治北一百六十里西抵全茗界南抵養利
界東抵萬承界宋置隸邕州元隸太平路明因馬洪武

初土官李鐵釘歸附授世襲知州以流官吏目佐之

土官

底簿云李正英世襲茗盈土官洪武二年歸附授知州二十四年患病子福茂襲永樂四年福茂死子斌襲宣德二年斌死李復初子子實襲老疾正統十二年子懋齡襲患疾成化二年子季東襲成化三年死無子弟季華十三年襲華死子萬青襲萬青死弟萬榮襲萬榮死弟萬新未襲死以弟萬和之子顯奇襲

思同州在府治東二百里東南抵羅陽界西抵萬承界

北抵永康界舊名永寧為西原地唐置隸邕州宋隸太

平寨元隸太平路明因焉洪武元年黃克嗣歸附授世

襲知州以流官吏目佐之

土官底簿云黃崇廣世襲土官祖父宗勝原襲曾祖父克

嗣思同州知州洪武十三年宗勝死崇廣父朝容襲三十二年朝容死崇廣襲正統十三年崇廣死子威顯襲成化十一年威顯死子志灝襲衰老子澄襲澄死子帥未授官被黃淵所害志灝亦鵠死以帥子寧襲

龍英州在府治北二百一十里東抵養利界西抵上映峒界南抵交趾界北抵向武界舊名英山宋為峒元為州隸太平路明因焉洪武元年土官趙世賢歸附授世襲知州割上懷州地入其版圖以流官吏目佐之

土官底簿

參舊通志云龍英趙氏元時有趙斗南元齡忠順世全世堅相繼襲官明洪武元年元齡子世賢歸附授知州十二年世賢死子人忠襲三十五年人忠死子武威襲武威死子崇森襲宣德八年崇森死弟崇彬襲景泰四

年崇彬死子文榮襲被賊射傷天順八年子萬寧未襲
死子元匡襲元匡死弟元瓚襲元瓚死無子弟元瑤襲
結安州在府治東北二百二十里東抵都結界西抵鎮
遠界南抵龍英界北抵佶倫界舊名營周為西原農峒
地宋置結安峒隸太平寨元改為州隸太平路明因焉
洪武元年土官張仕榮歸附授世襲知州以流官吏目
佐之土官底簿洪武元年結安土官張仕榮歸附二年授知州仕泰死無子弟仕榮二十六年襲仕榮死
子高永樂四年襲正統十一年被佶倫州知州馮宗富
等殺死子伯綱襲伯綱死無子弟伯通襲伯通死子文
貴襲文貴死子威
顯襲生子世忠

佶倫州在府治東北三百三十里東抵都結界西南抵結安界北抵鎮遠界舊名那兒為西原農峒地宋置安峒隸太平寨元建為州隸太平路明因焉洪武元年峒長馮萬傑歸附授世襲知州流官吏目佐之

舊通志云佶倫馮氏

舊為那兒洞長繼為安峒知峒元末有馮萬傑者明洪武元年歸附二年授知州患病子志威襲亦患病永樂七年子郎高襲郎高死子崇富未襲死子紹琬襲成化三年紹琬死子奎未襲死子萬禧亦未襲死以紹琬之子晏保襲生子珣

思明州東抵思明府西抵交趾界南抵西平州界北抵

龍英州界宋置州屬太平寨元屬思明路土官黃姓與

思明府同族洪武初黃鈞壽歸附授世襲知州屬思明

府後因黃竄煽亂改屬太平

土官底簿云黃鈞壽係本府知府黃忽都弟洪武元

年欵附二年授知州二十一年鈞壽死子志銘襲舊通志云志銘子邨孫真相繼死有黃義者稱為真所生告保承襲成化十三年況村黃紹以兵逐之而據其州奪大小民村凡二十有四弘治六年紹復以兵脅知府黃道給券與其子文昌領州事九年義奏愬于朝下所司捕之紹仰藥死十六年文昌仍具牘冒黃真宗支爭襲數為邊患上命副總兵康泰參政楊茂元等將兵討之乃遣思城州土官趙忠順計擒文昌誅之以義子永寧襲其後文昌子黃泰復據其州泰死子恩詔襲恩詔死弟恩錫襲恩錫死弟恩隆襲萬歷十年恩隆與思明

府土官黃承祖爭四寨二十九村委官勘之以四寨宜屬思明府黎龍等村以那强為界那强以西如板勲等十三村給思明州那强以東如板盜等十六村給思明府後恩隆故子拱極未襲庶弟黃拱聖謀之承祖弑拱極并其母撫臣劉繼文以黃承祖助逆議削其地奏將所爭村寨盡給思明州

羅陽縣在府治東二百里東抵新寧界西抵陀陵縣界

南抵大江界北抵宣化縣界舊名福利為西原峒地宋

置隸遷隆寨元隸太平路明因焉洪武初土官黃宣歸

附授世襲知縣以流官典史佐之

土官底簿云宣伯父谷保洪武二年授羅

陽知縣四年有忠州官族黃郎道首下頭目黃陸陪逃來本縣藏躲官軍緝捕谷保奔入山崙自割身死子嗣

勦殺盡絕祖父黃得全因先年被馱盧興兵霸占縣治不能安居與父用隆出外倚住洪武七年招諭回縣各病死洪武十八年以宣係谷保親姪准襲宣德五年宣死子廣通襲八年廣通死無子弟廣海襲天順三年廣海死子宗愈襲成化十三年宗愈死子敬仁襲敬仁死子景淳襲景淳生子鉦麟

陀陵縣在府治東一百四十里東抵羅陽縣界西抵養

利界南抵大江界北抵思同界舊名駱陀為西原農峒

地宋置隸古萬寨元隸太平路明因焉洪武初土官黃

福壽歸附授世襲知縣以流官典史佐之

土官底簿云黃福壽世襲

陀陵知縣明初歸附被本府土官知府黃英衍拘留洪武三年福壽死子真亮襲永樂六年真亮死子勝祐襲

欽定四庫全書

粵西文載
卷十二

三

宣德七年勝祐死子璉襲正統十一年璉死堂兄富襲
富死子永寬襲間亦死成化十三年孫晟襲晟死子文
榮襲文榮死
子萬寧襲

思明府古百粵地東抵廣東欽州界西抵交趾界南抵
思陵州界北抵江州界漢屬交趾郡唐置思明州隸邕
州宋隸永平寨元改思明路有土官黃忽都者為思明
總管洪武元年忽都歸附詔改思明路為府錫印授世
襲知府設流官同知佐之子廣平襲廣平死無嗣弟廣
成襲廣成死子瑯襲其庶兄琬亦以捍禦功累遷都指

揮使守潯州景泰間瑯老以庶子鈞襲嫡子鉢怨問計於玘玘欲因而奪之遣子震偽徵兵於思明夜襲瑯鈞殺之歸報於鉢已而又圖奪嫡都御史李棠誘玘鉢執之震與子紹奔龍州鉢死於獄郡人立鈞子道襲玘度不得免時純皇帝在東宮景皇帝有子曰見濟玘遣人入京先賂用事者乃具奏請立見濟為皇太子景帝大悅時藤峽賊方熾尚書于謙奏令玘赴軍前討賊立功玘以功進都督未幾英皇復辟玘自殺命發棺鞭其屍

成化年間總督韓雍捕震誅之

舊通志云思明黃氏其先世知思明州宗仁宗

時狄青奏充路分官以鎮邊境土元有黃克順者仕武毅將軍兼南寧路總管傳子萬山生子六皆賢長武勝武略將軍思明總管賜金虎符次武宗以總管擢廣西兩江道宣慰司都元帥子忽都繼之洪武元年兵至南寧忽都納土奉印章內附二年詔以思明路為府授忽都知府世襲忽都死子廣平襲二十八年廣平死無子弟廣成襲永樂十一年廣成死子瑯襲有風疾乞休子鈞襲景泰間為浣村黃震所殺子道襲成化間又為震之子黃紹所殺及鳩其子光壁正德四年孫賜襲賜死無子以叔崇壁之子吳襲吳死亦絕以道弟逗之子澤襲澤死子世興襲世興死子承祖襲

下石西州在思明府治西宋分石西州置屬永平寨元

屬思明路洪武二年土千戶閑賢歸附授世襲知州以

流官吏目佐之

上官底簿云閑賢前元襲授洞兵千戶因本州土官亡絕洪武元年舉保二年

授知州十八年賢死子三貴襲永樂二年三貴死無子弟聰襲十六年聰死子瑀襲舊通志云成化間有閑能者襲職為況村黃紹所殺破其州奪民村十有七分仲子黃文盛領之弘治九年能之孫遇奏下所司撫捕十二年紹始以州還遇後遇無子妻鄭養其兄子鄭德冒為遇子詭名閑真賂府用事頭目黃邦傑黃永昇矯府檄令真攝州事遂遇出之紹密計盜遇印以昇文盛仍專州事正德六年黃文昌計擒鄭真出所竊印稱在真所按獲文盛恐真事泄鳩殺之謂真畏罪自以印獻後遇歸州死閑芳襲

江州古百粵地東抵忠州界西抵龍州界南抵思明府

界北抵太平府界漢屬交趾號江陽宋置江州隸古萬寨元屬思明路明因焉土官黃威慶歸附授世襲知州

以流官吏目佐之改直隸布政司

土官底簿及舊通志云江州黃氏元時世

知州事明洪武元年黃威慶歸附錫印襲知州生子三長中立次中謹知忠州季中榮知上思州威慶死洪武二十二年兄中立襲永樂四年征進失陷頭目陸郭安等子智賢襲被頭目殺死十五年弟智斌襲正統二年智斌死堂姪能政襲景泰四年能政死無嗣弟能廣襲患疾成化二年子海襲海死子永鎮襲永鎮死無子弟

永鉛襲

羅白縣在江州治東北宋建屬遷隆寨元屬江

州洪武初土官梁敬賓歸附授世襲知縣敬賓死子復

昌襲永樂間從征交南被陷子福里襲

土官底簿云羅白梁氏洪武元

年梁原泰欵附三年授土官知縣五年征進被傷二十三年子敬斌襲敬斌死無子弟敬宣告襲謀殺本州知州黃智斌下獄宣德十年子永現襲永現死子福祥襲

利州古百粵地東抵泗城界西抵安隆界南抵田州界

北抵永寧州界漢屬交趾號販麗莊宋建利州隸橫山

寨元因爲土官岑姓者洪武初納欵授知州以流官吏

目佐之隸布政司

土官底簿云原任知州岑志良死無子委泗城知州岑振管事振死子琬

不勝任以岑瑤子顏永樂元年襲

正統間知州岑顏奏本州地二十五

里泗城知州岑豹興兵攻占勅廣西總兵官柳溥等及
三司御史親詣其地諭以利害令悉還所侵豹不奉命
顏復請于朝第行鎮官開諭耳豹終不悛攻殺岑顏及
其子璿奪去州印遂以流官判官管州事數十年間屢
經諸司劾奏移檄遣官督追歷岑應岑接三世如故嘉
靖二年田州歸順那地土官岑猛等興兵攻泗城破其
州擒岑接殺之督府遣官按問追出州印覈其宗枝無
可據者印發賓州貯庫地方兵民歸併泗城州

舊通志
云有岑

良者稱利州宗族乞襲其官但顏璿父子被害時有次子璿禁錮于泗城十餘年更名活弘治四年泗城岑接弒岑應活始得偕其子略瓊廣三人逃避于思恩府移檄覈勘

龍州古百粵地東抵太平府界西抵上下凍州南抵思明府北抵安平漢屬交趾宋置龍州隸太平寨元大德中陞州為萬戶府洪武初土官趙帖堅歸附授世襲知州以流官吏目佐之帖堅死無嗣二十五年姪宗壽襲已而鄭國公常茂以罪謫龍州納帖堅女為妾擅州事茂病卒宗壽以聞有人告茂匿龍州未死者詔總兵官

楊文征之宗壽赴闕伏罪遂罷征宗壽死三十一年子景昇襲景昇死無嗣宣德三年以叔仁政襲仁政死景泰四年子南傑襲南傑死成化十一年子源襲正德三年源死無子庶兄浦有二子長相次楷相當立楷妬之謀岑氏以僕韋隊子璋詭云遺腹而岑氏兄子猛方熾楷遂奏言璋實源子當立為相所篡事下督府未決璋賂鎮守太監傅倫舍人王祥詭云有制猛偽檄調兵二萬人送璋入龍州左江大震相挈印奔浞村都御史楊

旦討璋猛殺之相乃歸相二子長燧次寶相枝拇寶亦
枝拇相絕愛之曰肖我當立猛乃以寶去髡為奴嘉靖
元年相死州人立燧楷弑之州人立其族弟煖時王守
仁提督兩廣幕客岑伯高幸用事楷賂伯高言煖非趙
氏裔當立者楷也遣上思知州黃熊兆覈之熊兆黨伯
高言楷當立以州印畀楷楷遂殺煖大亂州目黃安等
潛往田州購寶寶時為奴楊布家十三年矣安等行百
金購得之言之督府都御史林富謂楷勢已張毋持之

急乃令楷攝職俟寶長讓之楷復時時謀殺寶富諭楷令以印還寶寶謝以五千金益以腴田三十一村楷計寶弱易與不如徼厚利而徐圖之遂聽命楷復求韋璋之子應育之令往來寶所寶妻黃氏思明府土官黃朝女也貳於寶而與應通應乃厚結州目及遣人向武州乞兵自樹寶日荒悍刑姣男子王良為閹楷知良恨寶激使內應良許之楷以千人夜至寶寢門呼良良開門納楷兵執寶寢所斬之以他盜聞應以兵千人桀據州

治并結黃朝自援都御史蔡經謀副使翁萬達圖之萬
達謂楷狙詐未可速圖韋應吳懷寡慮可旦夕擒斷其
中堅然後可次第獲督府善之萬達行部至太平使人
以他事召黃朝諭之計論應當死時諸言楷事者故不
為理州人大譁萬達愈厚楷時時稱楷勇冠軍可當一
面楷信之遂統精兵千人詣萬達言狀并以三十一村
地獻萬達留語旬日楷寢慰弛不為備部兵多以乏糧
遣歸萬達召楷及州目鄧禹等入見伏壯士刼之曰汝

罪滔天宜自為計汝死官必及汝子可為書諭汝黨勿
亂楷自分必死乃為書諭其黨曰業已如此亂無益也
可善輔我子以存趙萬達即杖楷斃之以楷書諭其州
人時楷子匡時生四年矣立之一州悉定乃以十三村
還龍州十八村隸崇善縣

思陵州古百粵地漢屬交趾宋置思陵州屬永平寨元
屬思明路明初省入思明府洪武二十一年復建改直
隸廣西布政司土官韋姓明初省州以韋延壽為峒長

二十一年復建州錫印以延壽知州事許世襲以流官

吏目佐之

土官底簿云永樂四年延壽死子成襲正統元年成死子昌襲成化十四年昌死子長襲

正德三年患病子瑄襲瑄死子千寶襲千寶死子祐襲

憑祥州宋為憑祥峒屬永平寨元屬思明路其先酋長

有李應星者元知西平州兼領永平等處事李德懋知

上石西州兼憑祥峒後擢思明路同知李元長

土官底簿作李

壽賢襲知上石西州兼憑祥峒洪武元年内附二年授知

洞殘疾二十四年子昇襲二十八年授憑祥峒巡檢永

樂二年改鎮建憑祥縣擢為知縣昇死永樂四年子成

土官底簿
作李慶青

襲死子壽祥以疾不能襲成化十一年子廣

寧襲十八年改縣陞憑祥州擢廣寧為知州子宏未授

官為龍州趙相所害以其子珠襲珠死無嗣衆保弟珍

襲弟珏爭立珍挈印奔況村況村土舍黃泰以其妹黃

孟妻之州目李清李滿趙琪蘇寄枝等謀納珍說思明

府土舍黃朝曰李珍失守宗祧越在草莽若以君之靈

得復入奉烝嘗願以州備下屬黃朝喜約黃泰納珍憑

祥珍聽說客歐紹賢等語悔約不屬思明蘇寄枝爭之
不得遂陰比黃朝朝有外婦子王金寶更名時芳詭云
廣寧孫以千人納時芳憑祥弗克李珍曰荒淫無度州
人患之廣寧庶子竄謀廢立而珍妻黃孟亦以失寵孤
憤竄通焉十七年竄遂約李滿蘇寄枝為亂以兵劫趙
琪琪不得已與之盟頃之寄枝巡徼偽驚諄竄等擁兵
入執珍寢所斬之李清聞亂呼趙琪以外甲入救琪匿
不至竄遂持黃孟並坐部兵發庫藏爭財亂擊殺數十

人明日橐置酒高會召李清清不得已赴之臨觴竊歎
橐私於歐紹賢曰是夫腹誹者就座中擊殺之會安南
莫登庸反因厚賂橐為嚮道變聞都御史蔡經大駭屬
副史翁萬達圖之萬達遣人諭橐曰天子將有事交南
邊圉之臣有用命者尊官可立取橐遂自薦願效力萬
達益厚與之又遣人恐黃泰令擒李橐自白泰唯唯乃
委指揮錢希賢徵兵泰所部勒若行邊者至憑祥擒李
橐李滿蘇寄枝等論死已而李珣李時芳復爭立萬達

會參議田汝成鞠之論時芳死黜珏而以李珍弟琪之子佛襲時芳復謀將官營求羈保逃之思陵州興兵攻入州治佛竄山中跌死子德勝襲

附直隸都司千戶所二

遷江屯田千戶所乃遷江縣附郭直隸廣西都司洪武二十五年始開設土官衙門轄土夸頭目凌文彬等一十七人後征勦有功陞百戶一十四員頒印建置百戶所分掌土兵為四屯逐年出征甲兵一千二百名守城

甲兵三百名官兵俱不支俸糧惟領勦過夸賊田土耕種當差又設流官千戶一員宋真以掌所事各百戶所土官皆聽命焉其土官百戶因功陞授千戶勦古田千戶黃祿有功陞授指揮

嘉靖初正千戶黃瑞副千戶黃濬百戶凌顯梁順覃瓊覃瓚蘇

盛皆莫祥其系流官千戶陳獻亦莫知所由來


五屯屯田千戶所舊為古贈村在藤縣北境居斷藤峽左臂洪武八年土人覃福招集所部猺獞八百六十四人編充桂林右衛中左所軍以福擢授千戶領之後寢

逋亡成化二年韓雍既平峽賊遣本管千戶李慶招出
軍丁五百六十人并籍獍民盡編土兵奏以古贈村建
五屯屯田千戶所仍以李慶掌所事授覃福之孫仲璜
為土官世襲吏目防遏峽路白石寨十二磯濛江口賊
衝覃福舊為慶遠南丹人明洪武四年率所部狼獍
遷居藤州寧風鄉闢荒田以自給遂為五屯屯民
附沒入交趾土州二

祿州隸思明在府城東南宋置屬永平寨元屬思明路
洪武初省入思明府二十一年復置尋沒於交趾永樂

三年復置後仍沒於交趾

西平州隸思明在城西南宋置屬永平寨元屬思明路
洪武初併入思明府永樂三年復置後仍沒於交趾



粵西文載卷十二